



12. August 2016

EM 2016/99

Inatsisartut suleriaasianni § 33 naapertorlugu aalajangiiffissatut siunnersuut manna saqqummiuppara:

Naalagaaffiit Peqatigiit Innarluutilinnut isumaqatigiissutaata atortuulersinneqarneranut aatillugu ussersornermik atuisut, innuttaasullu allat attaveqarniarnerminni ajornartorsiutillit isumaqatigiissummut ilaatinneqartut, nakorsiarneranni malitseqartitsinermut kiisalu nangittumik katsorsarneqarnerannut atatillugu allakkatigut nassuiaammik tiguisalernissaat pillugu Naalackersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Agathe Fontain, Inuit Ataqatigiit)

Tunggavilersuut:

Inuiaqatigiit kalaallit innarluutillit pillugit isumaqatigiissutikkut pituttugaapput.

Tusilartut tusaaniarnermikkullu annertuumik ajornakusoortitsisut nakorsiarnerminnut peqqinnissaqarfimmilu katsorsarneqarnerminnut atatillugu ussersornermut oqalutsimik pisariaqartitsisarput, taamaalilluni peqqinnissaqarfiup nakorsiarullu akornanni attaveqatigiinnerup ajutoornerani paatsoornerni siunertarineqanngitsunik kingunipilutsitsisinnaasunilluunniit paatsooqatigiinnernik pisoqaqqunagu.

Peqqinnissaqarfimmi ussersornermik oqalutsinik amigaateqartoqarnera pissutigalugu, ussersornermik oqaasillit ilaquttatik nutserisutut atortariaqartarpaat, taakkuli peqqinnissaqarfimmi oqaatsinik atorneqartunik sungiusimannittuunngillat, taamaammallu taamatut aaqqeeriarneq pitsaanerpaanani, ilaqutarisamimmi allatut atornartumik ikiorneqartariaqaraanni namminerisamik inuuneqarnermut tunggatillugu tamanna ajornakusoornartuuvoq.

Innarluutillillu allat nakorsiarnerminni kiisalu kingorna katsorsarneqarnerminni, aammalu nakorsarneqarnerminni paatsoornermik pisoqaqqeqqunagu aamma immikkuullarissumik attaveqarsinnaaneq pisariaqartippaat.

Taamaammallu tusilartut innarluutillillu allat nakorsiarnerminni kingornalu katsorsarneqarnerminni allakkatigut nassuiaavigineqarnissaat pingaaruteqartorujussuuvoq. Naalagaaffiit Peqatigiit nunarsuaq tamakkerlugu innarluutilinnut isumaqatigiissutaat Inatsisartut akuersissutiginikuuat.

Tusilartullu innarluutillillu allat nutserisumik pissarsinissartik pisinnaatitaaffigigaat, nutserisutut ilinniarsimasumik nutserunneqarnissartik pisinnaatitaaffigigaat tamatuma nassataraa. Pisinnaatitaaffik tamanna soorunami atuutsinneqassaaq, tamannali pissutsit nassatarisaannik pisinnaanngippat, taava paasinerluinerit peqqunagit allatut iluutsitut minnerpaamik allakkatigut nassuiaavigineqassapput.

Ilinniarsimasumik nutserunneqarsinnaanngikkaanni, nakorsiarnerup kingorna nakorsap qanoq aalajangersimanera kaammattuuteqarsimanageraluunniit qularnaatsumik paasissallugu pisariaqarpoq.

Tusilartummi paasinngisaanik nakorsap iliuuseqartarnera tusilartut misigisarpaat. Tamannalu pigaangat tamanna sakkortooujussuarmik kinguneqarsinnaasarpoq, tamannalu siunnersuutikkut ugguuna pinaveersimatinniarnearpoq.

Taama oqaaseqarlunga siunnersuutima tapersorsorneqarnissaa neriuutigaa.

Siunnersuutip allaffissornikkut aningaasatigullu kinguneqaatissai:

Innarluutillit pillugit isumaqatigiissutip Kalaallit Nunaannut atortuulersinneqarnissaa sillimmartaaruteqarnani akuersissutigineqarmat, peqatigisaanik kinguneqaatit nassatarineqartut ilanngullugit akuersissutigineqarput, kingunerisaanillu tunngaviusumik atortuulersinneqarneranut aningaasanik immikkoortitsisoqartussaagaluarluni, taamaattoqanngippammi paasissutissanik pissaqarnani naammattumilluunniit paasitinneqarnani aalajangerneq pisimassammat.

Innarluutillit pillugit isumaqatigiissutip atortuulersinneqarnerata nassatarisaanik, siunnersuutip uuma atuutilersinneqarnissaanut isumalluutit pigineqartut peqqinnissaqarfimmi isumaginnittoqarfinniluunniit pigineqarnerat taamaalilluni erseqqissaatigineqassaaq.